

Schnitzelbank anlässlich Jubiläumsfeier TCW 26.8.2017:

The Luftblöoterlis (Anne, Tschügge und Susi)

60 Jahr uf em Buggel a de hütige Fiir
Happy birthday liebe Tauchclub mit gratulired dir
Mängs isch passiert i dere Zyt
Los herä was für schrägi Gschichte s'git

E paar Manne händ gründet dä Verein
Und gseit, Fraue blibed besser diheim
Dänn tauche chönd die einewäg nid
Will's ja under Wasser nüt zschnorre git

A de erschte Versammlig vom TCW
12 Mitglieder händs welle und nöd meh
Wänn de Nachwuchs wiiterhin tuet fehle
Isch s'Ziel erreicht, chasch sälber zehle

Pädi händs im Club nöd welle
Die seiged im Tauche halt nid die helle
Und känned sogar dä Unterschid
Zwüsched une und obe nid

D'Siebesieche sind bim CMAS
det dörfsch tüüf tauche, halt mit Gas
Under Wasser gsehnds en Hai
Über em Wasser sinds dänn zwei

Ohni Schissideckel ischs früener nöd gangä
Zum Tariere hät er müese am Ranze hangä
Hüt sötted die Taucher en Sitzring ha
Wäg' de Hämmerhoide hinedra

S'isch en Fact und gar nüt Nöis
Under de Taucher häts ganz viel Chläus
Wänn Nuss und Schoggi vom Chlaus wottscha
Muesch bim Schupfe de Tröcheler voll laufe laa

Ääär-und-iiin und iin-und-ääär
De Drill uf Jurassisch isch legendär
Hüt isch s'Training am schönschte Abig i de Wuche
Aber für was gopferdeckel chasch s'Alfönsle bruche?



Dä Ahuga seit zum Melliger oje
saumässig chalt isch de Neuburgersee
D'Lösing isch klar, dänkt de Melliger still
Und so liit im Neuburgersee na hüt en Grill

Seit d'Anne keck zu ihrem Maa
Los Küde sött es Hobby ha
De rännt los, e Tauchusrüschting mues ane
Und liit zum Üebe für Stunde i d'Wanne



Jedä Dunschtig am Namitag spaat
Stah de Trainingsleiter dihei parat
Doch us dä Chuchi lockt d'Silv überfründli
Liebä Uwe, wetsch nid lieber es Schäferstündli?

In Ägypte, das isch de Elsbi bekannt
Sind d'Manne schön und üsserscht charmant
Äs 'I love you' am Swissgirl is Öhrli gmungglet
Sie voll Freud und mit Gepäck grad is Wasser gumpet



A de DV anno 97 hät de Club kassiert
Mer hät das Gäld in en Helm investiert
Dä im Clublokal stolz vom Sockel abe grüesst
Dank em Pit wonen regelmässig putze muesst

Mister Koni, mer gsehts ihm a
Dä mues sparä, dä armi Maa
Doch würded neu Badhose verhindere
Dass sis sexy Popöchen tuet duerschimmere

Öb über oder underem Wasser
Öb Fält am Pnö öb schütters Haar
TCWler hebed zäme
Und wünsched sich 60 wiiteri Jahr

I de Trope, z'Ägypte oder am Rhy
Luftblöoterli sind bim Tauche debi
Wänn ihr euis wieder emal wänd gseh
Mir gönd jetzt grad uf Wälttournee

Es gäbt na vielviel meh z'verzellä
A dere oder andere Stelle
Aber eus isch jetzt de Pfuus verpufft
Es Luftblöoterli isch halt au nur Luft